

張氏景岳全書

江蘇王宜之
署簽

心腹痛

經義

舉痛論帝曰願問人之五臟卒痛何氣使然岐伯對曰經脈流行不止環周不休寒氣入經而稽遲注而不行客於脈外則血少客於脈中則氣不通故卒然而痛○帝曰其痛或卒然而止者或痛甚不休者或痛甚不可按者或按之而痛止者或按之無益者或喘動應手者或心與背相引而痛者或脇肋與少腹相引而痛者或腹中引陰股者或痛宿昔而滅積者或卒然痛死不知人少間復生者或痛而嘔者或腹滿而泄者或痛而閉不通者凡此諸痛各不同形別之奈何○岐伯曰寒氣客於脈外則脈寒脈寒則縮蜷縮則脈絀急絀急則外引小絡故卒然而痛得炅則立止因重中於寒則痛久矣○寒氣客於經脈之中與炅氣相薄則脈滿滿則痛而不可按也寒氣稽留炅氣從上則脈充大而血氣亂故痛甚不可按也○寒氣客於腸胃之間膜原之下血不得散小絡急引故痛按之則血氣散故按之痛止○寒氣客於俠脊之脈則深按之不能及故按之無益也○寒氣客於衝脈衝脈起於關元隨腹直上寒氣客則脈不通脈不通則氣因之故喘動應手矣○寒氣客於背俞之脈則脈泣脈泣則血虛血虛則痛其俞注於心故相引而痛按之則熱氣至熱氣至則痛止矣○寒氣客於客於厥陰之脈厥陰之脈者絡陰器繫於肝寒氣客於脈中則血泣脈急故脇肋與少腹相引痛矣○厥氣客於陰股寒氣上及少腹血泣在下相引故腹痛引陰股○寒氣客於小腸膜原之間絡血之中血泣不得注於大經血氣稽留不得行故宿昔而成積矣○寒氣客於五臟厥逆上泄陰氣竭陽氣未入故卒然痛死不知人氣復反則生矣○寒氣客於腸胃厥逆上出故痛而嘔也○寒氣客於小腸小腸不得成聚故後泄腹痛矣○熱氣留於小腸腸中痛痺熱焦渴則堅乾不得出故痛而閉不通矣○帝曰所謂言而可知者也視而可見奈何岐伯曰五臟六腑固盡有部視其五色黃赤為熱白為寒青黑為痛此所謂視而可見者也○帝曰捫而可得奈何岐伯曰視其主病之脈盛而血反陷下者皆可捫而得也○賓按本篇論痛總計一十三條所言寒氣

與氣相薄及熱氣留於小腸閉而不通者止二條為熱證而其他皆屬於寒則此證之藥可知學者當思所辨矣終始篇曰病痛者陰也痛而以手按之不得者陰也深刺之

痺論帝曰內含五臟六腑何氣使然岐伯曰五臟皆有合病久而不去者內含於其合也○胞痺者少腹膀胱按之內痛若沃以湯澀於小便上為清涕○痛者寒氣多也有寒故痛也

骨空論曰眇絡季脇引少腹而痛脹刺譴譴

調經論曰實者外堅充滿不可按之則痛○虛者聶辟氣不足按之則氣足以溫之故快然而不痛

平人氣象論曰寸口脈沉而弱曰寒熱及疝瘕少腹痛○寸口脈沉而橫曰脇下有積腹中有積積痛○脈急者曰疝瘕少腹痛

邪氣臟腑病形篇曰心脈微急為心痛引背食不下

衛氣篇曰新積痛可移者易已也積不痛難已也

厥病篇曰厥心痛與背相控善瘕如從後觸其心偃僂者腎心痛也厥心痛腹脹胸滿心尤痛甚胃心痛也

○厥心痛痛如錐鍼刺其心痛甚者脾心痛也○厥心痛色蒼蒼如死狀終日不得太息肝心痛也○厥心痛卧若徒居心痛間動則病益甚色不變肺心痛也○真心痛手足青至節心痛甚旦發夕死夕發旦死○腸中有蟲瘕及蛟蝮心腸痛懷作痛腫聚往來上下行痛有休止腹熱喜渴涎出者是蛟蝮也○以上皆有刺法

詳在本經

雜病篇曰心痛引腰脊欲嘔取足少陰○心痛腹脹噎嗝然大便不利取足太陰○心痛引背不得息刺足少陰不已取手少陽○心痛引小腹滿上下無常處便澁難刺足厥陰○心痛但短氣不足以息刺手太陰○心痛當九節刺之按已刺按之立已不已上下求之得之立已

六元正紀大論曰不遠熱則熱至不遠寒則寒至寒至則堅痞腹滿痛急下利之病生矣○土鬱之發甚則

心痛脇脹嘔吐霍亂飲發注下○金鬱之發心脇滿引小腹善暴痛不可反側○水鬱之發民病寒客心痛○木鬱之發民病胃脘當心而痛上支兩脇脇咽不通食飲不下○火鬱之發民病骨痛腹中暴痛

邪氣臟腑病形篇曰大腸病者腸中切痛而鳴濯濯冬日重感於寒即泄當臍而痛不能久立與胃同候取巨虛上廉○胃病者腹脹胃脘當心而痛上支兩脇脇咽不通食飲不下取之三里也○小腸病者小腹痛腰脊控牽而痛時窘之後取之巨虛下廉○膀胱病者小便偏腫而痛以手按之即欲小便而不得取委中央五邪篇曰邪在肝則兩脇中痛寒中惡血在內行善掣節時脚腫○邪在脾胃則病肌肉痛陽氣不足陰氣有餘則寒中腸鳴腹痛○邪在心則病心痛善悲時眩仆○以上俱有刺法在本經

經脈篇曰脾足太陰之脈入腹屬脾絡胃其支者復從胃別上膈注心中是動則病舌本強食則嘔胃脘痛腹脹善噫心下急痛得後與氣則快然如衰○心手少陰之脈起於心中出屬心系是動則病嗌乾心痛渴而欲飲○腎足少陰之脈其支者從肺出絡心是動則心如懸若飢狀舌乾咽腫煩心心痛○心主手厥陰之脈起於胸中出屬心包絡是動則胸脇支滿煩心心痛○膽足少陽之脈其直者從缺盆下腋循胸循脇裏是動則病口苦善數息心脇痛不能轉側

論證 共四條

凡病心腹痛者有上中下三焦之別上焦者痛在膈上此即胃脘痛也內經曰胃脘當心而痛者即此時人以此為心痛不知心不可痛也若病真心痛者必手足冷至節爪甲青旦發夕死夕發旦死不可治也○中焦痛者在中脘脾胃間病也○下焦痛者在臍下肝腎大小腸膀胱病也○凡此三者皆有虛實寒熱之不同宜詳察而治之

一痛有虛實凡三焦痛證惟食滯寒滯氣滯者最多其有因蟲因火因痰因血者皆能作痛大都暴痛者多由前三證漸痛者多由後四證但蟲痛痰痛多在中焦火痛則三焦俱有之血痛則多在下焦然惟婦人則常有血

證而男子則少也諸如此類但察其多滯多逆者方是實證如無滯逆則不得以實論也辨之之法但當察其可按者為虛拒按者為實久痛者多虛暴痛者多實得食稍可者為虛脹滿畏食者為實痛徐而緩莫得其處者多虛痛劇而堅一定不移者為實痛在腸臟中有物有滯者多實痛在腔脇經絡不干中臟而牽連腰背無脹無滯者多虛脈與證參虛實自辨微實者宜調不宜攻大實者或上或下非攻不可純虛者或氣或血非大補不可一痛證有寒熱誤認之則為害不小蓋三焦痛證因寒者常居八九因熱者十惟一二觀內經舉痛等論義可知矣蓋寒則凝滯凝滯則氣逆氣逆則痛脹由生而熱則流通多不然也雖熱證亦常有痛然熱者必有明辨如內經所言腸中痛而躁熱焦渴則堅乾不得出閉而不通者此因燥結熱閉故能作痛然必有煩熱等證乃因於火最易見也今之醫家但見心腹痛證無問有無寒熱便云諸痛皆屬於火多用寒涼不知此說出自何典而彼此訛傳無據無根妄亦甚矣又見丹溪治法云凡心腹痛者必用溫散此是鬱結不行阻氣不運故痛也此說誠是也然又引原病式云若欲行溫散無助火添病也由是古方多以山梔為主加熱藥為向導或用二陳湯加川芎蒼朮倍加梔子煎服痛甚者加炒乾薑反佐之若此議論治法余則大有不服夫致病之由熱者自熱寒者自寒病因火邪清利自愈固不必反佐也病因寒濕溫散自愈又何為反助火耶蓋寒者熱之熱者寒之此自正治之正理豈可不論經權不分從逆既宜梔子又宜乾薑藥用反佐而治寒犯寒治熱犯熱乎因致後代醫流凡有見不真者每每借此為成法而藉口反佐誤人於疑似之中者不少矣故余特為反佐論在前二卷中以盡其義宜均察也一痛證當辨有形無形無形者痛在氣分凡氣病而為脹為痛者必或脹或止而痛無常處氣聚則痛而見形氣散則平而無跡此無形之痛也但宜順氣氣順則痛自愈矣○有形者痛在血分或為食積凡血凝食積而為脹痛者必痛有常所而脹無休息不往不來不離其處者是有形之痛也然或食或血察得所因乃可攻而去之此二者之當辨也

凡諸病之虛實辨之於脉者皆易惟心腹痛證則有大有小其脉多有難辨雖滑實有力者固多實邪虛弱無神者固多虛邪此其常也然暴痛之極者每多沉伏細澀最似極虛之候不知氣為邪逆氣逆則脉道不行而沉伏異常此正邪實之脈然於沉伏之中細察之必有梗梗然弦緊之意此必寒邪阻遏陽氣者多有是脉若火邪作痛則不然也凡見此者不得因其細極微極便認為虛脫妄用補劑必大誤矣辨此之法但當察其形氣以見平素之強弱問其病因以知新病久病及何所因而起大都暴病痛急而脉忽細伏者多實邪久病痛緩而脉本微弱者為虛邪再以前論虛實之法酌之以理參而診之則萬無一失矣

論治 共十五條

凡心腹痛證必須先辨寒熱如無熱證熱脈則定非火邪不得妄用涼藥

凡治心腹痛證古云痛隨利減又曰通則不痛此以閉結堅實者為言若腹無堅滿痛無結聚則此說不可用也其有因虛而作痛者則此說更如水炭

一凡痛在上焦者如因停滯既痛兼脹不易行散而痛極難忍者欲其滯去速效無如吐之妙宜於新方吐法中擇而用之若無停積脹急而或寒或氣微有凝滯而作痛者但順其氣無有不愈 一胃脘痛證多有因食因寒因氣不順者然因食因寒亦無不皆關於氣蓋食停則氣滯寒留則氣凝所以治痛之要但察其果屬實邪皆當以理氣為主宜排氣飲加減主之食滯者兼乎消導寒滯者兼乎溫中若止因氣逆則但理其氣病自愈矣其有諸藥不效氣結難解者惟神香散為妙○若氣有滯逆隨觸隨發者宜用後簡易二方最妙 一下焦小腹痛者或寒或熱或食或蟲或血或氣逆皆有之凡閉結者利之下之當各求其類而治之 一寒滯之痛有因內寒者如食寒飲冷之類是也必兼寒兼食隨其宜而治之如上法可也○有因外寒者或觸冒不時之寒邪或犯客令之寒氣或受暴雨沙氣之陰毒以致心腹攪痛或吐或瀉或上不能吐下不能瀉而為乾霍亂危劇等證總由寒氣犯臟或在上焦或在中下二焦凡痛急在上者用吐最妙在中在下者俱宜解寒行

滯以排氣飲為主加減治之或不換金正氣散或和胃飲平胃散十香丸之類皆可擇用其有寒逆之甚者宜
四逆湯理中湯之類主之又神香散可解三焦之滯當隨證作引以送之 一血積之有腹痛者是即蓄血證
也而血證之屬有四○一傷寒有蓄血證成無已曰邪氣聚於下焦則津液不得通血氣不得行或溺或血留
滯於下是生脹滿而鞭痛也若從心下至少腹鞭滿而痛小便利者則是蓄血之證此當分而治之其他證治
詳義並見傷寒門○一婦人有血痛證詳見婦人門○一跌打損傷有瘀血腹痛證但去其瘀而痛自愈凡氣
血和平者宜通瘀煎加減治之○其有血滯便結邪實不通者宜桃仁承氣湯百順丸主之或血虛燥結便閉
不通者宜玉燭散主之○一食鬱既久而胃脘有瘀血作痛者生韭飲○一氣血虛寒不能營養心脾者最多心
腹痛證然必以積勞積損及憂思不遂者乃有此病或心脾肝腎氣血本虛而偶犯勞傷或偶犯寒氣及飲食
不調者亦有此證凡虛痛之候每多連綿不止而亦無急暴之勢或按之揉之溫之熨之痛必稍緩其在心脾
胸脇之間者則或為戚戚或為慌慌或似饑非饑或似勞更甚或得食稍可或懊懷無跡莫可名狀或形色青
黃或脈微氣弱是皆虛寒之證此非甘溫養血補胃和中不可也宜大小營煎理陰煎之類加減主之若氣虛
者必大加人參陽衰者必佐以桂附乾薑丹溪曰諸痛不可補氣此惟邪實氣滯者當避之而曰諸痛皆然則
謬矣不可執以為辭也○一下虛腹痛必因虛挾寒或陽虛中寒者乃有之察其形迹而喜按喜煖者是也治
宜補陰逐寒必宜理陰煎主之然男子則間或有之惟女人則因虛而痛者更多蓋女人有月經帶濁之病所
以為異亦宜理陰煎大劑主之余用此以活人多矣若虛中挾滯而血有不行者惟決津煎為最妙諸未盡者
詳婦人門○凡治心腹痛證已經攻擊滌蕩愈而復作或再三用之而愈作愈甚或脈反浮弦虛大者皆為中
虛之候此當酌其虛實而或兼治邪氣或專補正氣若用補無碍則當漸進切不可雜亂妄投以自掣其肘但
當純用補藥使脾胃氣強得以運行則邪氣自不能犯又何疼痛之有一火邪熱鬱者皆有心腹痛證如火在
上焦痛而兼脹者宜於行氣導滯藥中倍加山梔黃芩之屬以治之若有痛無脹者或宜加芍藥生地麥冬以

佐之○若火在下焦者宜大分清飲或茵陳飲之類主之○然火在上者必有煩熱焦渴喜冷等證火在下者必有脹熱秘結淋澀等證務兼脈證察其真有火邪方可治以寒涼如無火證火脈則不得妄稱為火以誤治也 一蟲痛證治詳見諸蟲門 一痰飲停滯胸膈亦能作痛凡胸膈悶澀澀有聲或作醋酸心嘔惡或痛連脇背者皆其證也宜清膈煎二陳湯橘皮半夏湯局方四七湯及括痰丸潤下丸之類並皆治之○又若東垣草豆蔻丸升麻白朮丸亦皆治痰之劑 若鬱痰凝結消之不去者非用吐法不能除也 一陰寒腹痛者凡男婦有因房室之後中寒而痛極者此陰寒也宜先用蔥薑搗爛炒熱或熱磚之屬熨其臍腹以解其寒極凝滯之氣然後用理陰煎或理中湯四逆湯之類加減治之其有痛極至危者須速灸神闕氣海等穴 一凡胸腹之痛有無關於內而在筋骨皮肉之間者此邪之在經不可混作裏證必須詳問的確但當分其或火或寒或氣或勞傷或血滯或血虛或有淫瘡邪毒留蓄在經辨其所由庶不致謬而治之亦易也 一大人小兒或素因口腹不節致傷脾胃以後或寒或食凡有所觸即為腹痛屢發不已或為脹滿食減等證者惟芍藥枳朮丸為最妙宜加減用之 一凡胸膈大痛連及脇背藥不能納到口即吐者此則無論諸藥皆可發吐因就其勢探而吐之則最易最捷吐出邪滯積痰痛可立止若邪猶未盡痛猶未止則再以前藥與之務盡其邪無不愈者

述古 共二條

陳無擇云十二經絡外感六淫則其氣閉塞鬱於中焦氣與邪爭發為疼痛足厥陰心痛兩脇急引小腹連陰股相引痛手心主痛微背心煩掌中熱咽乾目黃赤脇滿足太陰心痛腹脹滿瀉瀉然大便不利脇悶咽塞手太陰心痛短氣不足以息季脇空痛遺失無度胸滿煩心足少陰心痛煩極面黑心懸若饑胸滿腰背痛背脊痛諸經心痛心與背相引心痛微背背痛微心諸腑心痛難以俛仰小腹上衝卒不知人嘔吐泄瀉此皆諸經諸腑諸腑涉邪所致病屬外所因○若五臟內動汨以七情則其氣痞結聚於中脫氣與血搏發為疼痛肝心痛者

色蒼蒼如死狀終日不得太息真心痛者如前經義脾心痛者如錐針刺其心腹蘊蘊然氣滿肺心痛者若從心間起動作痛益甚色不變腎心痛者與背相控善應如物從後觸其心身僂僂胃心痛者腹痛胸滿不下食食則不消皆臟氣不平喜怒哀鬱所致此屬內因○飲食勞逆觸忤非類使臟氣不平痞滿於中食飲逆注變亂腸胃發為疼痛或飲啖生冷果實中冷不能消散結而為積遺食遺發名積心痛及有臟寒生蛇致心痛者所謂九種心痛曰飲曰食曰風曰冷曰熱曰悸曰蟲曰注曰去來痛者除風熱寒屬外所因餘皆不內外因○更有婦人惡血入心脾經發作疼痛尤甚於諸痛更有卒中客忤鬼擊虎症使人心痛亦屬不內外因丹溪曰心痛即胃脘痛雖日數多不喫食不死若痛方止便喫物還痛必須三五服藥後方可漸漸喫物○痛甚者脈必伏用溫藥附子之類不可用參朮○脈弦者是食宜溫散蓋食得寒則凝得熱則化更用行氣或利藥助之無不愈○脈滑者是痰痰因氣滯而聚阻碍道路氣不得通而痛宜導痰解鬱○凡痛必用溫散以其鬱結不行阻氣不運故也○腹痛以手可重按者屬虛宜參朮薑桂之類手不可按者是實宜用硝黃下之○肥白人腹痛多是氣虛兼濕痰宜半夏人參二朮之類○飲食過傷而腹痛宜木香檳榔丸下之如氣虛之人傷飲食而腹痛宜調補胃氣并消導藥參朮山查枳實麥芽木香神麴之類○如腹中常有熱而痛此為積熱宜調胃承氣湯下之○小腹實痛用青皮以行其氣小腹因寒而痛宜桂枝吳茱萸○臍下忽大痛中黑者多死○心痛用山梔并劫藥止之若又復發前藥必不效可用玄明粉一服立止○脈堅實不大便者下之

食停小腹新按

凡腹痛因食者或因滯物或因冷物皆能停積中脘須用前治食法加減治之此正法也然又有食停小腹者余嘗治一上舍年及三旬因午刻食水煮鰯魚將至初更食及小腹下至右角間遂停積不行而堅突如拳大如鵝卵其痛之劇莫可名狀余為治之察其明係積積顯而無疑然計其已入大腸此正通則不痛之證也乃與木香檳榔丸連下二三次其痛如故因疑藥力之緩猶未及病乃更投神祐丸以瀉之又不敢余謂此必藥

性皆寒故滯有不行也因再投備急丸雖連得大瀉而墜痛毫不為減斯時也余計窮矣因潛測其由不過因新豈無所以制之今既逐之不及使非借氣以行之不可也且計新毒非大蒜不殺氣滯非木香不行又其滯深道遠非精銳之嚮導不能達乃用火酒磨木香令其嚙生蒜一瓣而以香酒送之一服後覺痛稍減三四服後痛漸止而食漸進方得全愈然雖痛止食進而小腹之塊仍在後至半年許始得消盡由是知欲消食滯即大黃巴豆猶有所不能及而推宜行氣為先也且知飲食下行之道乃必由小腹下右角間而後出於廣腸此自古無人言及者故并筆之以廣人之聞見

括沙新按

向予荆人年及四旬於八月終初寒之時偶因暴雨後中陰寒沙毒之氣忽於二鼓時上為嘔惡下為胸腹攪痛勢不可當時值暮夜藥餌不及因以鹽湯探吐之痛不為減遂連吐數次其氣愈升則其痛愈劇因而上塞喉噎甚至聲不能出水藥毫不可入危在頃刻間矣余忽憶先年曾得秘傳括沙法乃擇一光滑細口磁碗別用熱湯一鍾入香油一二匙却將碗口蘸油湯內令其暖而且滑乃兩手覆執其碗於病者背心輕輕向下刮之以漸加重碗乾而寒則再浸再刮良久覺胸中脹滯漸有下行之意稍見寬舒始能出聲頃之忽腹中大響遂大瀉如傾其痛遂減幸而得活瀉後得睡一飯頃復通身瘙癢之極隨發出疙瘩風餅如錢大者不計其數至四鼓而退愈後細窮其義蓋以五臟之繫咸附於背故向下刮之則邪氣亦隨而降凡毒氣上行則逆下行則順改逆為順所以得愈雖近有兩臂刮沙之法亦能治痛然毒深病急者非治背不可也至若風餅疙瘩之由正以寒毒之氣充塞表裏經臟俱閉故致危劇今既臟毒既解然後經氣得行而表裏俱散也可見寒邪外感之毒凡臟氣未調則表亦不解表邪未散則臟必不和此其表裏相關義自如此故治分緩急權衡在人矣繼後數日一魏姓者亦於二鼓忽患此證治不得法竟至五鼓痛極而斃遇與不遇此其所以為命也

附按

徐東舉云匡掌科夫人年三十餘病胃脘連胸脇痛甚輕夜甚兩寸關脈弦滑有力諸醫以積滯凝寒用發散及攻下藥繼用鐵刷散四磨飲等方俱不效後用湯水皆吐而不納經月不食痛且益甚予謂其為痰鬱明矣但痛久弱甚不敢行吐法奈何偶一醫謂五靈脂沒藥素用有效衆皆哂之曰此藥用之多矣予謂再用亦無妨何哂之有彼用酒調病者到口便吐隨吐綠痰兩碗許痛即止遂納飲食此蓋痰在膈上攻下之亦不去必得吐法而後愈經曰有故無殞此之謂歟

簡易方

一胃脘當心而痛或氣或寒觸而屢發者用荔枝核燒微焦每荔枝核一錢加水香七分共為末以清湯下一錢許數服可以除根屢試神效者 一胸膈胃脘大痛察有邪滯連用排氣飲及諸藥全不見效者但用升皂角以微火燒烟甫盡即取起為末用燒酒調送七八分或一錢許其效如神亦余試効者

兵部手集方 治久心痛十年五年者隨手效用小蒜以醋煮熟頓服此後再不發

治脾痛三方歌 腹脹脾疼怎抵當椒薑之外有丁香三般等分羅為末調入白鹽與白湯 水磨烏藥治脾疼每服須教一盞濃一片陳皮一蘇葉再煎濃服有神功 心與脾疼有妙方良薑切碎等檳榔兩般同炒研為末米飲同調服亦良

食療方 治五臟冷痛心腹痛以胡椒二十一粒搗碎熟酒服之

肘後方 治心腹俱脹痛短氣欲死或已絕者用官桂三兩切碎以水一升二合煮八合去渣頓服無桂用薑亦可

腹痛灸法

內關 中脘 氣海 神闕 水分 膈俞 脾俞 胃俞

心腹痛論列方

吐法新攻

排氣飲新和

木香檳榔丸攻四

潤下丸新和

茵陳湯新寒

十香丸新和

白螺丸新和

神祐丸新和

理中湯新和

論外備用方

荔枝散新和

遊山散新和

附子茴香散新和

四磨飲新和

鐵刷散新和

指迷七氣湯新和

八味湯新和

祛痛散新和

厚朴溫中湯新和

備急丸攻五

局方四七湯新和

通瘀煎新和

二陳湯新和

括痰丸新和

芍藥枳朮丸新和

東垣草豆蔻丸新和

不換金正氣散新和

赤金豆新和

調氣平胃散新和

人參散新和

強中湯新和

八味建中湯新和

平拈散新和

調痛散新和

胡椒理中湯新和

勝金散新和

大分清飲新塞

大營煎新和

神香散新和

調胃承氣湯新和

橘皮半夏湯新和

平胃散新和

和胃飲新和

決津煎新和

木香順氣散新和

參附湯新和

牙皂散新和

茱萸四逆湯新和

烏藥散新和

七氣湯新和

丁香止痛散新和

胃愛散新和

舒筋散新和

四逆湯新和

小營煎新和

桃仁承氣湯新和

清膈煎新和

玉燭散新和

生韭飲新和

理陰煎新和

百順丸新和

歸脾湯新和

神祐丸新和

藿香安胃散新和

蘇合丸新和

益黃散新和

木香調氣散新和

蟠葱散新和

玄桂丸新和

丁香伏苓湯新和

大沉香丸 熱百十四 冷氣

木香導氣丸 因二七六 小腸氣痛

事後中寒腹痛 因七二

脇痛 經義

沉香桂附丸 熱百十二 寒氣

金匱大建中湯 補二三 寒痛

椒附丸 熱百十三 小腹痛

附子理中湯 熱三 虛寒

大已寒丸 熱一七 寒病

溫胃湯 熱十三 寒傷脾

吳茱萸散 熱百四十 寒濕

小建中湯 補二二

冷香湯 熱八二 生冷

臟氣法時論曰肝病者兩脇下痛引少腹令人善怒○心病者胸中痛脇支滿脇下痛

大奇論曰肝壅兩脇滿卧則驚不得小便

邪客篇曰肝有邪其氣流於兩脇

熱論篇曰傷寒三日少陽受之少陽主膽其脈循脇絡於耳故胸脇痛而耳聾

刺熱篇曰肝熱病者熱爭則狂言及驚脇滿痛手足躁不得安卧刺足厥陰少陽○熱病先胸脇痛手足躁刺

足少陽補足太陰

舉痛論曰寒氣客於厥陰之脈則血泣脈急故脇肋與少腹相引痛矣

玉機真臟論曰風寒客於人弗治則病入舍肺弗治肺即傳而行之肝名曰肝痺脇痛出食○春脈不及則令

人胸痛引背下則兩脇脹滿

五藏生成篇曰青脈之至也長而左右彈有積氣在心下支脰名曰肝痺

脈要精微論曰肝脈搏堅而長色不青當病隆若搏因血在脇下令人喘逆

五邪篇曰邪在肝則兩脇中痛寒中惡血在內行善掣節時脚腫取之行間以引脇下補三里以溫胃中取血

脈以散惡血取耳間青脈以去其掣

欬論曰肝欬之狀欬則兩脇下痛甚則不可以轉轉則兩脇下滿

繆刺論曰邪客於足少陰之絡令人卒心痛暴脹胸脇支滿無積者刺然骨之前出血如食頃而已○邪客於

足少陽之絡令人脇痛不得息欬而汗出刺足小指次指爪上與肉交者各一痛○邪客於足太陽之絡令人拘攣脊急引脇而痛刺之從項始數脊椎俠脊疾按之應手如痛刺之傍三痛立已

胃空論曰眇絡季脇引小腹而痛脹刺譴謔邪氣藏腑病形篇曰肝脈微急為肥氣在脇下若覆杯○胃病者腹脹胃脘當心而痛上支兩脇膈咽不通食飲不下取之三里也

奇病論曰病脇下滿氣逆二三歲不已病名曰息積此不妨於食不可灸刺積為導引服藥藥不能獨治也

四時刺逆從論曰少陽有餘病筋痹脇滿

厥論曰少陽之厥暴聾癰腫而熱脇痛肝不可以運

腹中論曰有病胸脇支滿者妨於食病至則先聞脛膝莫出清液先唾血四支青目眩時時前後血病名曰血

枯此得之年少時有所大脫血若醉入房中氣竭肝傷故月事衰少不來也治以烏賊魚骨丸

脈解篇曰少陽所謂心脇痛者言少陽盛也盛者心之所表也九月陽氣盡而陰氣盛故心脇痛也

五藏生成篇曰腹滿腹脹支脇脹脇下厥上冒過在足太陰陽明

經脈篇曰心所生病者目黃脇痛○心主手厥陰心包絡也是動則病手心熱甚則胸脇支滿心中憺憺大動

○膽足少陽也是動則病口苦善太息心脇痛不能轉側

本藏篇曰肝小則藏安無脇下之病肝大則逼胃迫咽迫咽則苦脇中且脇下痛肝高則上支脅切脇悅為息

責肝下則逼胃脇下空脇下空則易受邪肝堅則藏安難傷肝脆則善病消痺易傷肝端正則和利難傷肝偏

傾則脇下痛也○脾小則藏安脾大則苦湊肋而痛不能疾行脾高則眇引季脇而痛○胸脇好者肝堅脇骨

弱者肝脆脇骨偏舉者肝偏傾也

標本病傳論曰夫病傳者心病先心痛一日而咳三日脇支痛五日閉塞不通身痛體重三日不已死○肺病

喘咳三日而脇支滿痛一日身重體痛五日而脹十日不已死○肝病頭目眩脇支滿三日體重身痛五日而脹三日腰脊少腹痛腰痠三日不已死○腎病少腹腰脊痛肝痠三日背脇筋痛小便閉三日腹脹三日兩脇支痛三日不已死○諸病以次是相傳如是者皆有死期不可刺

氣交變太論曰歲木太過風氣流行肝病反脇痛而吐甚○歲火太過炎暑流行甚則胸中痛脇支滿脇痛○歲金太過燥氣流行肝木受邪肝病兩脇下少腹痛脇痛不可轉側○歲木不及燥乃大行肝病中清脇痛○歲火不及寒乃大行肝病胸中痛脇支滿兩脇痛○歲土不及復則收政嚴峻名木蒼凋胸脇暴痛下引少腹○木不及其肯東其臟肝其病內舍肱脇外在關節○火不及其肯南其臟心其病內舍膺脇外在經絡○金不及其肯西其臟肺其病內舍膺脇肩背外在皮毛

六元正紀大論曰厥陰所至為脇痛嘔泄○金鬱之發民病欬逆心脇滿引少腹善暴痛不可反側○木鬱之發民病胃脘當心而痛上支兩脇

至真要大論曰歲厥陰在泉風淫所勝民病心痛支滿兩脇裏急飲食不下○歲陽明在泉燥淫所勝民病心痛脇痛不能反側○厥陰司天民病胃脘當心而痛上支兩脇膈咽不通飲食不下○少陰司天熱淫所勝民病胸中煩熱右肱滿○陽明司天民病左肱脇痛心脇暴痛不可反側○厥陰之勝胃脘當心而痛上支兩脇太陰之勝病在肱脇○陽明之勝清發於中左肱脇痛○陽明之復清氣大來病生肱脇氣歸於左

論證 共三條

脇痛之病本屬肝膽二經以一經之脈皆循脇肋故也然而心肺脾胃腎與膀胱亦皆有脇痛之病此非諸經皆有此證但以邪在諸經氣逆不解必以次相傳延及少陽厥陰乃致脇肋疼痛故凡以焦勞憂慮而致脇痛者此心肺之所傳也以飲食勞倦而致脇痛者此脾胃之所傳也以色慾內傷水道壅閉而致脇痛者此腎與膀胱之所傳也傳至本經而無非肝膽之病矣至於忿怒疲勞傷血傷氣傷筋或寒邪在半表半裏之間此目

一脇痛有內傷外感之辨凡寒邪在少陽經乃病為脇痛耳聾而嘔然必有寒熱表證者方是外感如無表證悉屬內傷但內傷脇痛者十居八九外感脇痛則間有之耳 一脇痛有左右血氣之辨其在諸家之說有謂肝位於左而藏血肺位於右而藏氣故病在左者為血積病在右者為氣鬱脾氣亦係於右故濕痰流注者亦在右若執此說則左豈無氣右豈無血食積痰飲豈必無涉於左乎古無是說此實後世之謬談不足憑也然測在氣在血何以辨之但察其有形無形可知之矣蓋血積有形而不移或堅硬而拒按氣痛流行而無迹或倏聚而倏散若食積痰飲皆屬有形之證第詳察所由自可辨識且凡屬有形之證亦無非由氣之滯但得氣行則何聚不散是以凡治此者無論是血是痰必皆兼氣為主而後隨宜佐使以治之庶得肯綮之法無不善矣

論治 共三條

一外感證邪在少陽身發寒熱而脇痛不止者宜小柴胡湯三柴胡飲或河間葛根湯之類酌宜用之○若外邪未解而兼氣逆脇痛者宜柴胡疎肝散主之若元氣本虛陰寒外閉邪不能解而脇痛畏寒者非大溫中飲不可 一內傷肝胆氣逆不順而脇痛者宜排氣飲推氣散沉香降氣散水香調氣散之類主之○若鬱結傷肝中脘不快痛連兩脇或多痰者宜香橘湯 若暴怒傷肝氣逆脹滿胸脇疼痛者宜解肝煎 若怒氣傷肝因而動火脇痛脹滿煩熱或動血者宜化肝煎○若氣滯胸脇痛而兼喘者宜分氣紫蘇飲○若男子憂鬱傷肝兩脇疼痛者宜枳實散○若男婦肝腎氣滯自下而上痛連兩脇者宜木通散○若悲哀煩惱肝氣受傷脈緊脇痛者枳殼煮散○若因驚氣逆脇痛不已者桂枝散○若食積作痛但痛有一條扛起者是也大和中飲或用保和丸○若痰飲停伏胸脇疼痛者導痰湯加白芥子○若肝火內鬱二便不利兩脇痛甚者當歸龍薈丸或左金丸○若從高跌墜血流脇下作痛者復元活血湯○若婦人血滯脇腹連痛者芍藥散決津煎○

若肝脾血虛或鬱怒傷肝寒熱脇痛者逍遙散○若肝腎虧損脇肋作痛頭眩心跳身痛或婦人經水不調經後作痛者補肝散○一內傷虛損脇肋疼痛凡房勞過度腎虛羸弱之人多有胸脇間隱隱作痛此肝腎精虛不能化氣氣虛不能生血而然凡人之氣血猶源泉也盛則流暢少則壅滯故氣血不虛則不滯虛則無有不滯者倘於此證不知培氣血而但知行滯通經則愈行愈虛鮮不殆矣惟宜左歸飲小營煎及大補元煎之類主之或有微滯者用補肝散亦可○若憂思過度耗傷心脾氣血病有如前者宜逍遙飲三陰煎七福飲之類主之或歸脾湯亦可○若以勞倦過傷肝脾氣血而病如前者宜大營煎大補元煎之類主之

灸法

治卒脇痛不可忍者用蠟繩橫度兩乳中半屈繩從乳斜趨痛脇下繩盡處灸三十壯更灸 章門壯 邱墟

三壯可鍼
八五分

脇痛論列方

- | | | | | | | | | |
|-------------------------|-------------------------|-------------------------|---------------------------|---------------------------|-------------------------|-------------------------|-------------------------|--------------------------|
| 三陰煎 <small>新補十一</small> | 歸脾湯 <small>補三</small> | 大溫中飲 <small>新散八</small> | 香橘湯 <small>新和七</small> | 化肝煎 <small>新寒十</small> | 左歸飲 <small>新補二</small> | 補肝散 <small>婦九</small> | 大補元煎 <small>新補一</small> | 分氣紫蘇飲 <small>和三五</small> |
| 七福飲 <small>新補七</small> | 三柴胡飲 <small>新散三</small> | 枳實散 <small>和七</small> | 解肝煎 <small>新和十一</small> | 復元活血湯 <small>外四十二</small> | 河間葛根湯 <small>散百</small> | 沉香降氣散 <small>和四</small> | 木香調氣散 <small>和四</small> | 保和丸 <small>小三</small> |
| 小柴胡湯 <small>散十</small> | 逍遙飲 <small>新因九</small> | 導痰湯 <small>和一</small> | 當歸龍薈丸 <small>寒一六七</small> | 小營煎 <small>新補十五</small> | 大營煎 <small>新補十四</small> | 排氣飲 <small>新和六</small> | 左金丸 <small>寒一四</small> | 枳殼煮散 <small>散百九</small> |
| 逍遙散 <small>補九</small> | 推氣散 <small>和七</small> | 柴胡疎肝散 <small>散百</small> | 桂枝散 <small>散百</small> | 決津煎 <small>新因二</small> | 芍藥散 <small>婦三十</small> | 木通散 <small>散百</small> | 大和中飲 <small>新和七</small> | |